

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu "Petrol BH Oil Company", d.o.o. Sarajevo broj 05-28-12-376-1/19 od 28. oktobra 2019. godine, na sjednici Državne regulatorne komisije za električnu energiju, održanoj 29. januara 2020. godine, donijeta je

## **ODLUKA**

### **O IZDAVANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM**

1. Izdaje se licenca za obavljanje djelatnosti međunarodne trgovine električnom energijom podnosiocu zahtjeva "Petrol BH Oil Company" d.o.o. Sarajevo.
2. Licenca iz tačke 1. ove Odluke izdaje se za period od 1. marta 2020. godine do 28. februara 2025. godine i koristi se u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom ("Službeni glasnik BiH", broj 14/16).
3. Licenca za obavljanje djelatnosti međunarodne trgovine električnom energijom sastavni je dio ove Odluke.
4. Vlasnik licence je u obavezi plaćati regulatornu naknadu u periodu važenja licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a dispozitiv Odluke bit će objavljen u "Službenom glasniku BiH" i službenim glasilima entiteta.

### **Obrazloženje**

Društvo "Petrol BH Oil Company" d.o.o. Sarajevo (u daljnjem tekstu: podnosilac zahtjeva) posjeduje licencu za obavljanje djelatnosti međunarodne trgovine električnom energijom, koja je upisana u Registar licenci kod ove Komisije pod registracijskim brojem 05-28-12-387-17/14 od 25. februara 2015. godine, a čije trajanje ističe 29. februara 2020. godine.

Shodno pravu da koristi mogućnost obnove licence i ispunjavajući obavezu iz člana 48. Pravilnika o licencama – Prečišćeni tekst ("Službeni glasnik BiH", broj 63/16) da najkasnije 120 dana prije isteka važnosti posjedujuće licence, izrazi svoju namjeru da djelatnost međunarodne trgovine električnom energijom nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem 05-28-12-376-1/19 od 28. oktobra 2019. godine. O podnijetom zahtjevu odlučuje se u skladu sa pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u BiH ("Službeni glasnik BiH", br. 7/02, 13/03, 76/09 i 1/11).

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima dostavljenim uz zahtjevi ili naknadno, koji su omogućili DERK-u da razumije, razmatra i odlučuje o podnijetom zahtjevu, o čemu je obavijestio podnosioca zahtjeva svojim aktom broj 05-28-12-376-5/19 od 27. novembra 2019. godine.

Po pregledu i provjeri svih formalnih elemenata zahtjeva, DERK je najprije 28. novembra 2019. godine objavio u dnevnim novinama i na svojoj internet stranici kratku obavijest za javnost, sumirajući zahtjev za licencu i odredio rok do 6. decembra 2019. godine za dostavljanje komentara javnosti na podnijeti zahtjev za izdavanje licence.

DERK je konstatirao da nisu dostavljani komentari javnosti u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja međunarodnu trgovinu električnom energijom jer je tokom prethodnog petogodišnjeg perioda korištenja licence permanentno potvrđivao svoje tehničke, pravne i finansijske mogućnosti i pružao dokaze da ima osigurane resurse, organizirane uvjete i utvrđene profesionalne standarde da nastavi obavljati istu djelatnost.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti međunarodne trgovine električnom energijom, dao je osnova DERK-u da pristupi izdavanju nove licence, odnosno pripremi Nacrt odluke o izdavanju licence za djelatnost međunarodne trgovine, koja bi važila novih pet godina i koja se koristi u skladu sa Standardnim uvjetima za korištenje licence za obavljanje djelatnosti međunarodne trgovine električnom energijom.

Ovaj dokument je od 8. januara 2020. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 15. januara 2020. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

Kako podnosilac zahtjeva ni u posljednjoj prilici do 24. januara 2020. godine, po podnesku DERK-a broj 05-28-12-376-16/19 od 17. januara 2020. godine, nije isticao neslaganje sa bilo kojom odredbom Prijedloga odluke, bilo je osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne energije u BiH i podzakonskim propisima koji reguliraju predmetnu materiju.

Na osnovu svega naprijed izloženog, te respektirajući i dokaz da je podnosilac zahtjeva prethodno ishodio novu dozvolu Regulatorne komisije za energiju u Federaciji BiH za snabdijevanje električnom energijom – dozvolu II reda, sa rokom važenja od 19. novembra 2019. godine do 18. novembra 2024. godine, DERK je odlučio kao u dispozitivu ove Odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-376-18/19

29. januara 2020. godine

Tuzla

Predsjedavajući Komisije

Suad Zeljković